

आकाशवाणी

खबरां पूजा वजीर कोला

1. सरकार विकसित भारत बक्खी बददे होई सार्वजनिक क्षेत्र दे बैंकें आस्तै बैंकिंग सुधारें दी समीक्षा लेई उच्च स्तर दी कमेटी खडेरग।
2. भारत नै ब्रिक्स सांझेदारी आस्तै लोक केंद्रित, मनुक्खता पहलें दे दृष्टिकोण दी दोबारा तस्दीक कीती।
3. बिहार च अशोक धाम मंदर च मची भगदड़ च 7 महिलाएं दी मौत, 5 लोक विरभम, पच्छिम बंगाल च अगग लग्गने दे हादसे च मारे गए।
4. भारती मौसम विभाग नै गंगीय पच्छिम बंगाल ते ओडिशा च अज्ज खरी मती बरखा बरने दी मेद करिए रेड अलर्ट जारी कीता।
5. मर्दे दे क्रिकेट च भारती गेंदबाजें मेजबान श्रीलंका टीम गी पैहली पारी च 284 रन गै बनान दिने, भारती टीम मैच दे त्रीए ध्याड़े 178 रन दी बढ़त गन्नै खेडा'रदी ऐ।
6. BWF बैडमिंटन विश्व चैंपियनशिप अज्ज नमीं दिल्ली च शुरू होई, मर्दे दी डबल श्रेणी च भारती जोड़ी एम.आर अर्जुन, हरिहरण अमसाकरुणन दुए गेड़ च पुज्जे।

<><><><><><>

FM Viksit Bharat

सरकार तौले गै विकसित भारत दे धेड़ये गी पूरा करने आस्तै बैंकिंग च उच्च स्तरीय कमेटी खडेरने जा'रदी ऐ। केंद्री खजाना मंत्री निर्मला सीतारमण होरें एह गल्ल नमीं

दिल्ली च दो ध्याड़े दे लोक क्षेत्र बैंक सम्मेलन दे उद्घाटन करने परेंत आक्खी। उनें आखेआ जे ओह भविष्य लेई बैंकिंग च सुधार आस्तै कम्म करग। मंत्री होरें कमेटी गी महत्वपूर्ण जानकारी उपलब्ध करांगन। निर्मला सीतारमण होरें जोड़ेआ जे भारती बैंकें दी स्थिति मजबूत ऐ जेदे करी आने आले समें च सुधार करने आस्तै मजबूत नीह मौजूद ऐ।

<><><><><><><><>

BRICS

भारत नै अपनी ब्रिक्स अध्यक्षता दरान ब्रिक्स देसैं कन्नै सहयोग बधाने लेई जन केंद्रित ते मनुक्खता गी पैहली तरजीह देने सरबन्धी सामूहिक जत्नें दे केंद्र च आम लोकें गी रक्खेआ ऐ। विदेश मंत्रालय च आर्थिक सरबन्धें सरबन्धी सचिव सुधाकर दलेला होरें नमीं दिल्ली ब्रिक्स सिविल फोरम गी संबोधित करदे होई आखेआ जे भारत गी ब्रिक्स अध्यक्षता च संचालित 350 शा मती बैठकें सवां बक्ख-बक्ख सैक्टरें दे बारै च महत्वपूर्ण निष्कर्ष हासल होए न। उनें आखेआ जे एहदे कन्नै ब्रिक्स संगठन दे त्रै आधार स्तम्भ राजनीतिक ते सुरक्षा सहयोग, वित्तीय सहयोग ते जनभागीदारी बिच्च तालमेल मजबूत होआ ऐ।

<><><><><><><><>

VP-AI

उपराष्ट्रपति सी.पी राधाकृष्णन होरें जोर देइयै आखेआ जे ए.आई ते तेजी कन्नै बदलावरदी तकनीक दे जमाने च स्नातक पढ़ाई दा अंत नेई ऐ, सगुआं लगातार नमें म्हौल दी जिंदगी च बदलाव दा जरिया ऐ। उपराष्ट्रपति होर तमिलनाडू दे थिरुवरू च

केंद्री विश्वविद्यालय दे 11में दीक्षांत समारोह गी संबोधित करा'रदे हे। उपराश्ट्रपति होरें 2014 थमां भारत दे शैक्षणिक ढांचे च बेमिसाल बाद्दे पर लौऽ पाई जेह्दे तैहत 16 आई.आई.टीज, 8 केंद्री विश्वविद्यालय, 8 आई.आई.एम ते 12 नमें एम्स पूरे देश च स्थापित कीते गए न। उनें आखेआ जे समाज च गरीबी ते नासमझी हटाने च शिक्षा गै इक्कला थेआर ऐ। राश्ट्री शिक्षा नीति-2020 बारै बोलदे होई उनें आखेआ जे शिक्षा गी हुन इक्कले सोचने-समझने दी शक्ति ते टीमें च कमम करने दे आधार पर तालेआ जा'रदा ऐ।

<><><><><><>

National Anubhav Awards

कार्मिक, लोक शिकायत ते पेंशन राज्यमंत्री डा. जितेंद्र सिंह होरें अज्ज नमीं दिल्ली च 15 चुने गेदे 15 जेतुएं गी राश्ट्री अनुभव पुरस्कार-2026 कन्नै नवाजेआ। इनें जेतुएं राश्ट्र निर्माण च योगदान दिता ऐ ते कई सरकारी परियोजनाएं जियां पासपोर्ट सेवा केंद्र, पराने कन्नै गी दोबारा लागू करना ते नमें कन्नू बनाना, प्रशासन च तकनीकी विकास आहनने च ओहदा हिस्सा रेह न।

<><><><><><>

Bihar-Stampade

बिहार च लक्खीसराय जिले दे अशोक धाम मंदर दे बाहर भगदड़ मचने करी 7 महिलाएं दी मौत जोई गई ऐ। इस हादसे च 10 श्रद्धालु गंभीर रूप कन्नै घायल होए न। मंदर च जल अभिशेक करने आस्टै श्रद्धालु मंदर दे बाहर बड़ी तादाद च कट्ठे होए दे हे

जेदे कारण एह माड़ी घटना पेश आई। गंभीर रूप कन्नै घायलें गी पटना मेडिकल कालेज भेजेआ गेआ ते बाकी घायलें दा ईलाज मकामी सदर अस्पताल च जारी ऐ।

<><><><><><>

Prez. PM Condolence

राष्ट्रपति द्रौपदी मुर्मू, उपराष्ट्रपति सी.पी राधाकृष्णन, प्रधानमंत्री नरेंद्र मोदी ते रक्षा मंत्री राजनाथ सिंह होरें बिहार दे लक्खीसराय जिले च भगदड़ च मारे गेदे श्रद्धालुएं दी मौत पर बसोस प्रगट कीता ऐ। इक सोशल मीडिया पोस्ट सांझा करदे होई राष्ट्रपति होरें सौगी परौआरें दे प्रति गैहरी संवेदना जताई। उपराष्ट्रपति ते प्रधानमंत्री होरें घायलें दे तौले नरोए होने दी प्रार्थना कीती। प्रधानमंत्री होरें भरोसा दोआया जे मकामी प्रशासन प्रभावितें दी मदद करा'रदा ऐ। रक्षा मंत्री होरें बी घायलें दे तौले ठीक होने दी कामना कीती ते सारें गी मुश्कल घड़ी च शांत ते मजबूत रौहने आस्तै आखेआ।

<><><><><><>

WB-Fire

पच्छिम बंगाल च बीरभग जिले दे तारापीठ पुलिस थाने दे कश इक होटल च अग्न लग्गने करी 5 लोकें दी मौत ते किश लोकें दे बमार होई जाने दी खबर ऐ। एह अग्न अज्ज बड़लै मूंज न्हरे लग्गी। जानकारी मताबक पैहले अग्न होटल दी रिसेप्शन च लग्गी ते तौले गै 4 मंजला ईमारत धोड़ी फैली गई। मते सारे लोक उसलै होटल च सोआ'रदे हे जिसलै एह दुर्घटना होई।

<><><><><><>

Weather

मौसम विभाग नै अज्ज ओडीशा ते पच्छिम बंगाल दे गंगा कन्नै लग्गदे इलाकें च मौलेधार बरखा बरने दी रेड अलर्ट आली चेतावनी जारी कीती ऐ। एहदे इलावा छत्तीसगढ़- पूर्वी मध्य प्रदेश- उत्तर प्रदेश ते उत्तराखंड लेई अज्ज भारी बरखा दा ऑरेंज अलर्ट ऐ। आंध्र प्रदेश- गुजरात- हिमाचल प्रदेश- कोंकण- गोवा- मध्य महाराष्ट्र- मराठवाड़ा ते उत्तर पूर्वी भारत दे किश हिस्सें च बी भारी बरखा दे असार न। मौसम विभाग ने अज्ज जम्मू-कश्मीर- बिहार- झारखंड- कर्नाटक ते ओडीशा च बिजली मिलने ते तेज ब्हाएं दे कन्नै बदल गरजने दी संभावना दस्सी ऐ। एहदे इलावा तमिलनाडू- पुदुचेरी, कराईकल, आंध्र प्रदेश, तेलंगाना ते अंडमान ते निकोबार टापुएं च बी अज्ज इस्सै चाल्ली दा मौसम बने दे रौहने दी मेद ऐ। मौसम मैहकमे ने इस हफ्ते पूरे केन्द्र शासत प्रदेश दे केंई सारें हिस्सें च हौली थमां दरम्याना दर्जे दी बरखा ते गरजी-लिशिकयै बरखा बरने दी पेशनगोई कीती ऐ। किश थाहरें पर खासकरियै बड्डलै सवेला ते चिरे दपैहरी यां संजा'लै तेज बरखा होई सकदी ऐ। अज्जै थमां 19 अगस्त तोड़ी जम्मू खितें दे किश जिलें च बी इयै नेहा मौसम बने दे रौहने दी मेद ऐ- जिसले के कश्मीर खिते दिएं किश थाहरें पर तेज बरखा होई सकदी ऐ।

<><><><><><>

Secy Bricks

पर्यावरण, जंगलात ते जलवायु परिवर्तन मंत्रालय च सचिव तन्मय कुमार होरें आखेआ ऐ जे ब्रिक्स संगठन पिछले 2 दाहकें च आर्थिक संवाद मंच थमां विकसित होइयै महत्वपूर्ण चुनौतिएं दे समाधान दा असरदार मंच बनी गेआ ऐ। एह चुनौतियां बधदे

प्रदूषण, जैव विविधता ते बदधे तापमान दी वैश्विक समस्या सवां सरबंधत ऐ। अज्ज नमीं दिल्ली च जलवायु परिवर्तन ते सतत विकास पर पर्यावरण कार्यसमूह ते संपर्क समूह दी बैठक दी अध्यक्षता करदे होई उनें आखेआ जे सतत विकास जलवायु समायोजन ते पर्यावरण दी राखी च भागीदारी मजबूत होई ऐ।

<><><><><><>

HP-Cloudburst

हिमाचल प्रदेश च चंबा जिले दे भरमौर थाहर च बद्दल फट्टने मगरा तेज बरखा च इक पी रूढ़ी गोआ। मां भगवती खुंडी वाली मंदर जाने आहले पैदल रस्ते गी बी नुकसान होआ ऐ। कुसा दे हताहत होने दी कोई खबर नेई ऐ।

<><><><><><>

Tiranga-Yatra

हरियाणा दे होदल च अज्ज हर घर तिरंगा मुहिम हेठ तिरंगा जातरा दा सरिस्ता कीता गोआ। जातरा च लोकें तिरंगे हत्थै च फगड़ियै ते भारत माता दी जय ते वंदे मातरम दे नारे लांदे होई हिस्सा लैता।

<><><><><><>

SC Cauvery Water

सुप्रीम कोर्ट नै अज्ज तमिलनाडू गी कावेरी दा पानी सरबंधत कर्नाटक गी कावेरी जल प्रबंधन प्राधिकरण दे दिशा-निर्देशों पर अमल करने आस्तै आखेआ ऐ। कोर्ट नै प्राधिकरण थमां स्टेटस ब्यौरा बी मंगे दा ऐ। न्याधीश विक्रम नाथ ते न्याधीश संदीप मेहता हुंदी

पीठ तमिलनाडू दी याचिका पर सुनवाई करा'रदी ऐ जेदे च तमिलनाडू नै सी.डब्ल्यू.एम.ए दे दिश-निर्देशों गी लागू करने बारै कर्नाटक गी 12 जहार पानी दे क्यूसस छोड़ने बारै पुच्छेआ। कोर्ट नै इस याचिका पर अगली सुनवाई 24 अगस्त गी तय कीती ऐ।

<><><><><><>

Indonesia-Earthquake

5.9 तीव्रता दे भूंचाल नै अज्ज बड़लै इंडोनेशिया दे फ्लोरस च अपना असर दस्सेआ। एहदे मगरा 10 किलोमीटर दी गहराई दे झटके बी मसूस कीते गए। एह भूंचाल 7.7 तीव्रता दे भूंचाल दे किश मगरा पूर्वी इंडोनेशिया च आए। देश दी राश्ट्री आपदा प्रबंधन एजेंसी नै दस्सेआ ऐ जे लगातार भूंचालें करी मरने आहलें दी गिनतरी 54 होई गई ऐ।

<><><><><><>

Cricket

मर्दे दे क्रिकेट च भारती गेंदबाजें श्रीलंका गी सिर्फ 284 रन गै बनान दिते ते गाले च पैहले टेस्ट मैच दे त्रीए दिन 178 रन दी बढ़त कन्नै खेडारदी ऐ। मानव सुथर नै 4 ते रविंद्र जड़ेजा नै 3 विकेटां लेइयां। जड़ेजा टेस्ट क्रिकेट इतिहास च 350 विकेटां ते 4 जहार रन बनाने आहले चैथे खडारी बनी गए न। मेजबान टीम आस्तै दीनुषा पै पैहले टेस्ट सेंचुरी बनाई ते रीशेन डिकवेला ने 80 रन बनाए।

<><><><><><>

BWF Badminton

बैडमिंटन विश्व चैंपियनशिप अज्ज नमीं दिल्ली दे इंदिरा गांधी इंडोर स्टेडियम च शुरू होई। मर्दे दी डबल श्रेणी च भारती जोड़ी एम.आर अर्जुन ते हरिहरण अमसाकारूनन दुए राउंड च पुज्जी गई ऐ। दुए खेड्ठ च एह जोड़ी 6-4 कन्नै अगगे ऐ ते उंदे प्रतिद्वंदी आयरलैंड दे स्काट गिल्डिया ते पाल रेनाल्ड्स चोटिल होई गए। एहदे शा पैहले अर्जुन ते अमसाकारूनन नै पैहला खेड्ठ 21-16 कन्नै जितेआ। मैच दे मगरा मीडिया कन्नै बोलदे होई भारती जोड़ी नै आखेआ जे देशवासिएं बक्खी हौसला अफजाई कन्नै उंदा हौसला बदेआ ऐ। उनें एह बी आखेआ जे खेड दी शुरूआत च अंक हासल करने कन्नै उंदी स्थिति मजबूत रेही। साबका विश्व चैंपियन ते 9मीं वरीयता प्राप्त पी.वी सिंधू होर महिलाएं दे एकल मुकाबले च आयरलैंड दी सोफिया नोबल कन्नै भिडंगन।

<><><><><><><><>

CASO-Udhampur

सुरक्षाबलें उधमपुर जिले दे रामनगर दे जोफर इलाके च इक बड्डा घेराबंदी ते तपाशी अभियान शुरू कीता ऐ। इलाके च 2 शा 3 बेपंछानू लोकें दी संदिग्ध नक्लोहरकत बारें टकोहदी सूह थोने मगरा एह अभियान चलाया गेआ ऐ जेहदे चलदे जम्मू-कश्मीर पुलिस, स्पेशल आपरेशन ग्रुप, फौज ते होरनी सुरक्षा एजेंसिएं दी इक सांझी टीम नै इलाके गी पूरी चाल्ली सील करी दिता ऐ। उधमपुर-रियासी रेंज दे डी.आई.जी ते एस.एस.पी उधमपुर सने उच्ची सतह दे अधिकारिएं मौके पर जाइयै निजी तौरा पर तपाशी अभियान दी निगरानी बी कीती।

<><><><><><><><>

LG-Ashram

उपराज्यपाल मनोज सिन्हा होरें अज्ज दक्खनी कश्मीर दे अनंतनाग जिले दे अच्छाबल च श्री रामाकृष्ण महासम्मेलन आश्रम दा दौरा लाया। इस बारै बोलदे होइ एल.जी होरें आखेआ जे ओह अनंतनाग दे आश्रम च आइयै विरासत ते संस्कृति दे संरक्षण पर केंद्रित परियोजनाएं दा नीह पत्थर रखने पर खुश न। उनें आखेआ जे उनेंगी मेद ऐ जे सेवा, एकता ते सनातन परम्पराएं दे मुल्ल असेंगी रमानदारी ते हमदर्दी बक्खी जाने लेई मार्गदर्शन करदे रौहडन।

<><><><><><>

Dragon

हर घर तिरंगा अभियान दे समापन दिवस उप्पर 26 राश्ट्री राइफल्स, जम्मू-कश्मीर पुलस, एसओजी ते मकामी जनजातीय समुदाय नै डोडा जिले दे कंडोलो टाप भलेसा च 9 जहार 750 फुट उप्पर तिरंगा झंडा फहराया। भलेसा घाटी च ड्रैगन दी आकार आहली चट्टान उपर हिम्मत एकता ते देशभक्ति दी भावना दी झलक दिक्खने गी लब्बा'रदी ही। इस बड़ी मती औक्खी चढ़ाई च 80 ब'रे दे करण सिंह बी शामिल होए जिनें एह साबत कीता जे देशभक्ति लेई उम दी कोई सीमा नई हुंदी।

<><><><><><>

NTA-Retest

मतेहाने सरबन्धी राश्ट्री एजेंसी NTA ने UGC-NET दे मतेहान लेई त्रै विशे- English, Commerce ते Sociology लेई परतियै मतेहान कराने दा ऐलान कीता ऐ। इनें त्रौनें विशे च पेपर च केई चाल्ली दी त्रुटे दिआं शकैतां हासल होने परैन्त एह फऐसला लैता गेआ

ऐ। NTA नै दस्सआ ऐ जे अंग्रेजी विशे दा परतियै म्तेहान औंदी 9 सितम्बर गी बड्डलै 9 बजे थमां दपैहरी 12 बजे तगर पैहली शिफ्ट च जिसले के Commerce विशे दा म्तेहान बी उस्सै दिन दपैहरी 3 बजे थमां संजा 6 बजे तगर दुई शिफ्ट च लैता जाहग। एहदे परैन्त Sociology विशे दा पेपर 10 सितम्बर गी बड्डलै 9 बजे शा दपैहरी 12 बजे तगर पैहली शिफ्ट च लैता जाना तय होआ ऐ। NTA ने UGC नेट दा म्तेहान 22 थमां 30 जून मझाटै 87एं विशें लेई आयोजित कीता हा।

<><><><><><>

Census

जम्मू-कश्मीर दे दूर-दरेडे ते बर्फू आहले इलाकें च अज्जै थमां मरदमशुमारी दे तैहत आपू अपनी गिनतरी दर्ज करने दी प्रक्रिया शुरू होई गई ऐ। एह 31 अगस्त 2026 तोड़ी जारी रौहग ते एह औंदी मरदमशुमारी दा हिस्सा ऐ। आकाशवाणी जम्मू दे संवादाता दी जानकारी मताबक दूर-दरेडे इलाके दे 11 सौ 15 गाएं ते त्रै नगरपालिकाएं दे लोक अपनी जानकारी ऑनलाईन दर्ज करोआई सकदे न। इय्यै नेह इलाकें च डोडा दे सब्भनै थमां मते गांs ते एहदे बाद किश्तवाड़ ते बारामूला दुई थाहरा पर न। मुख् जनगणना अधिकारी अमित शर्मा होरें आखेआ ऐ जे अधिकारी इस प्रक्रिया आस्तै पूरी चाल्ली तैयार न। उ'नै दस्सेआ जे 40एं करीब सुआल जनसंख्या, रोजगार ते जाति कन्नै सरबंधत जानकारी पर आधारत होडन।

<><><><><><>